



La Giulia verde 1300 e mangje i chilometris di autostrade par rivâ a Vicence...

In cinc in machine: trê zovins e doi grancj. Mio pari e mio barbe che a fumin par dut il viaç. Bert che al coree. Nicola che al rît.

Ma ce lino a fâ a Vicence? A viodi la mitiche disfide tra Udin e Parme par lâ sù in B! Lis dôs scuadris a son rivadis primis a pâr tal ziron de Alte Italie.

Jo o ai dîs agns e o soi bielzà un piçul apassionât des partidis al mitic Moretti. L'Udin al à i stes colôrs dal Parme e al piert la sortade des mais. Al scugne zuiâ in vert e al samee l'Avellino. Il Parme al à une bielissime maie cu la crôs nere in cjamp blanc e tal stadi a son tantis bandieris cul stes motîf tant che al samee di jessi sul set dal film *Aleksandr Nevskij* di Eisenstein e chei dal Parme a son i Cavalîrs Teutonicis (o ai bielzà viodût part dal film in TV). E mancje dome la glace. L'Udin al zuie cun ZANIER; ZANIN, BONORA, POLITTI, PIGHIN, ZAMPA; PELLIZZARI, GIACOMINI, BLASIGH, GALEONE, PAVONI.

A mancjin Girelli e Dedè, i nestrîs doi fuarts atacants.

E purtrop lis robis a van mâl. A la fin i "Teutonicis" si imponin par doi a zero e jo no rivi nancje a gjoldimi l'ultin cuart di ore parcè che o ai scugnût lâ tal cabôt e dopo o ai cjatât un

sdrume di int che mi impedìs di tornâ in tribune.

Bon. Si torne a cjase scuintiâts e si varà di spietâ ancjemò cinc agns par viodi finalmentri la B.

Mio pari e mio barbe a son muarts di agns. La Giulia 1300 e je finide intor di un platin propit tal an de promoziun in B.

Il Moretti nol esist plui. L'Udin al è in serie A e plen di champions di ogni bande dal mont ma distès no si rive a meti adun une squadre dignitose. Si combatarà par no lâ in B. Lis mais a cambin ogni an, soledut par vendilis di plui ai fans. I zuiadôrs si son trasformâts in oms-sandwich. A cjapin beçons.

Spes si metin insieme a lis "velinis".

Il stadi lu àn trasformât intune bomboniere o intune astronâf aliene. E jo o varès di lâ a viodi cualchi partide?

O ai miôr cjatâmi cun cualchi amì e fâ cualchi torneu di Subbuteo. O ai pene comprât lis scuadris dal Botafogo di Rio (al à ançje chel la maie blancje e nere a riis, come l'Udin) e dal Parme. I pipinuts a son ben piturâts. O vin il pano vert, lis puartis, la bale, lis biris... no nus mancje nie. La disfide e pues scomençâ. E cheste volte magari il risultât finâl al sarà diferent...

di Checo Tam